

FRANCONIA.

433

tem Pfawenberg, Civitas est valde amœna ad fluvium Regnitz sita. Habet Montes & Colles & plurimos hortos, fundumq; fecundissimum, ubi Pepones, & Glycyrrhiza crescunt maxima copia, ut supra quoque retulimus. Pepones habentur ibi atque Nurenbergæ quo deferuntur in delirijs. Sedes est Episcopalis, & cum alijs felicis ingenij alumnis gaudet, tum Ioachimo Camerario in omni doctrinarum genere celeberrimo. Testantur id opera ab ipso edita, quæ summa cum admiratione leguntur. *Frankofurtum* vel *Frankofordia ad Mœnum*, vulgo *Frankfurt am Mayn*, ad differentiam alterius ad Oderam sitæ. *Helenopolim* olim dictam scribit Munsterus, sed quando & a quibus non addit, Henrico Stephano in Encomio, quod ei Vrbi scripsit Nundinalis Musarum Academia. *Frankofordenses Athenæ*, Musarum Nundinæ Mercuriales, & totius Orbis Europiorum compendium, dicitur. Vrbs hæc in duas partes a Mœno perfluente distinguitur, quæ ponte lapideo conjunguntur. Civitas hoc tempore est Imperialis, binis per totum Orbem Nundinis celebris. Hic Romanos Reges eligi ab Electoribus mos est, ibidemque si Imperij binos Competitores esse contingat, uterque collecto exercitu de Imperio dimicant. *Moguntia* vulgo *Mentz*, alijs *Maguntiacum*. Ptolemæus *Neomagum* lib. 2. cap. 8. tab. 3. appellat, ut nonnulli volunt. Nomen habet Moguntia a Mœno fluvio, quem alij Moganum alij Mogum vocant. Civitas est Episcopalis & Metropolitana. Agrum habet, ab utraque Rheni ripa fecundum & præstantissimo Vino luxuriantem. Ampla est, bene munita, & spissa, tum populosa ex parte quam Rhenus adluit; ex alio vero latere rarum habitatorem habet, immensa est longitudine, latitudine angustior. Aedes amplissimæ sunt, Romanorum more, Basilica & Collegiata Templum magnifica, cum Arce Episcopali, Academia hic erecta est a Theodorico Episcopo. Huic Civitati adscribi solet Artis Typographicæ inventio. Præsuli suo proprio Archiepiscopo ac Electori, nec non S. Imperij Cancellario paret, *Mons Regius* vulgo *Kunigsberg*, Patria Ioannis de Monte Regio summi Mathematici, cuius extant subtilissima Commentaria in Almagestum Ptolemæi. *Schweinfurdia* ad Mœnum sita in medio prope Franconiæ. *Kitzinga*, *Fridberga*, urbs Imperij, & aliæ. Ceterum primus Circulus Imperij est Franconiæ, in quo hi ad Consilium convocantur, I. Ecclesiastici, Episcopi *Bambergensis*, *Herbipolensis*, (*VVirtzburg*) Dux Franconiæ, *Euchstett*: *Teutoburgensis*, *Burger vom Nuremberg*: Comites *Hennenbergensis*, *Castel*, *Wertheim*, *Rheineck*, *Hohenloe*: DD. *Reichelsberg*, *Limpurg*, & Comites *Horpach* & *Schwarzenburg*. III. Civitates liberæ, *Norunberg*, *Rottenburg*, *VVinsheim*, *Schweinfurt*. Flumina piscosissima undique regionem hanc perluunt beantque plurimum, quorum præcipua sunt *Mœnus*, *Sala*, octo ignobilioribus comitata. *Sinna*, *Radiantia*, *Astus*, *Tubera*, ac nonnulla alia. Silvas habet *Speshart*, *Ottonis Silvam*, ac alias etiam Herciniæ portiones, quæ eam æditissimis jugis per circuitum obfirmans, veluti nativo muro ambit. Gens ipsa viribus armisque potens, nobilitate pollens, ingeniosa, laborum patiens. Vinetis colendis uterque sexus incumbit, nec cuiquam otioso esse conceditur.

I i i

Bavaria

Flumina.

Silva.

Vulgi Mores.